

## 29-боб. Аллоҳ силаи раҳм қилгани яхши кўради



17:15 / 03.03.2019 3062

58. Ибн Умардан ривоят қилинади:

**«Расулуллоҳ соллаллоҳу алайҳи васаллам: «Ким Роббидан қўрқса, силаи раҳм қилса, унинг ажали кечга сурилади, моли кўпаяди, аҳли уни яхши кўради», дедилар».**

*Шарҳ:* Бу ерда ҳам силаи раҳм қилган одамга нафақат у дунёда, балки бу дунёнинг ўзида ҳам яхшиликлар бўлиши таъкидланмоқда.

Демак, силаи раҳм умрни зиёда қиладиган, ажални орқага сурадиган, ўз аҳлининг, яъни қавм-қариндошларининг муҳаббатига сазовор қиладиган нарса экан. Шунинг учун силаи раҳмга, қариндошларга яхшилик қилишга катта эътибор беришимиз лозим.

Ушбу ҳадисдан олинадиган фойдалар:

1. Аллоҳ таолога тақво қилган ва силаи раҳм қилган кишининг умри узоқ бўлиши.
2. Аллоҳ таолога тақво қилган ва силаи раҳм қилган кишининг моли кўп бўлиши.
3. Аллоҳ таолога тақво қилган ва силаи раҳм қилган киши аҳлининг, яъни барча яқинларининг муҳаббатига сазовор бўлиши.

*59. Ибн Умардан ривоят қилинади:*

**«Ким Аллоҳдан қўрқса, силаи раҳм қилса, унинг умрига умр қўшилади, моли кўпаяди ва аҳли уни яхши кўради».**

*Шарҳ:* Бу ривоят ҳам аввалги ҳадиснинг ўзи бўлиб, бошқа кишилар томонидан ривоят қилинган. Ҳадис уламолари ўз ривоятларини таъкидлаш учун бир ҳадис матнини бир неча санад билан қайта-қайта келтиришни одат қилишган.